

taua ra, i puta hoki te kohikohi i reira, £96 14s. 0d. hei moni whakaoti i etahi mea o te whare-karahia, hei mea whare-minita hoki mo tenei kainga. Ko nga rakau mo taua whare-minita tenei kua u mai; e kore e roa kua oti. He mea tenei e uru katoa ai tatou ki te koa o nga tangata o tenei Pariha, ka takoto nei i a ratou he taurira pai mo te mahi ki etahi atu o o tatou Pariha.

Tena ano tetahi mea hei whakaaturanga maku ki te Hui, ko te kupu i puta nei i te Hui i tera tau mo te Paipera i nga rarangi whaka-marama i kiia nei kia perehitia, i kohikohia hoki he moni iti nei mo te perehitanga. Ko te Kawenata Hou kua timataia te perehi, kua tae tenei ki te 25 o nga Upoko o te Rongo-pai a Matui te wahi kua tukua mai ki konei kia tirotirohia nga he o te perehitanga; kia hoki atu ano ki Ingarani, kia whakatikaia nga mea i he, katahi ka perehitia. Ko te Kawenata Tawhito, kahore ano kia oti te whakanoho nga rarangi, otira kei te mahia ano. E kore e tata wawe te otinga o taua Paipera, otira he mea tika kia puta ta tatou whakapai mo te timatanga o te perehitanga.

He maha nga kupu kua puta i enei tau kua pahure ake nei, kahore ano kia whakaritea. Tetahi mo te whakaaro a te Hahi kia puta ki nga iwi kua kotiti nei ki te karakia pohehe, kia whakahokia mai ki te whakapono ki te Rongo-pai o Ihu Karaiti. Kahore he tikanga o te kupu pai ki te kore e tuaratia ki te mahi. Kua puta te ki a nga Pihopa o tenei motu ratou ko nga Mihanere ki te taha Pakeha o to tatou Hahi kia whakaaroa tenei mahi, he mahi hoki e hangai mai ana ki te aroaro o te Hahi i Niu Tirani, e kore e taea te huri ke ma etahi atu e mahi. Kua whakaae mai te Komiti Mihanere o Ingarani kia homai kia taki £100 i te tau mo nga tau e rua hei whakakaha mo tenei mahi, ki te takoto wawe te £100 a te Hahi i Niu Tirani i tetahi tau, i tetahi tau; koia i whakahaua ai kia anga te Hahi i Niu Tirani, te taha Maori me te taha pakeha ki te kohikohi. Tenei ano ia tetahi wahi o te mahi, ma te Hahi Maori e whakarite. Ko te tu tangata i tika hei kukume mai i aua iwi, ko te tangata Maori. E kakama hoki ratou ki te whakarongo ki te waha Maori i te mea e turi ana ki te waha Pakeha. Heoi, ma te Hahi Maori tena wahi o te mahi, ara te homai tangata hei haere ki te mahi i roto i aua iwi, ma tatou tahi te kohikohi oranga mo nga tangata e tonoa ki taua mahi; ma tatou tahi te inoi tonu ki te Atua kia homai tona Wairua ki a ratou, kia mana ai ta ratou mahi. Tenei ano kei te haereere etahi o nga Minita Maori ki te toro i a ratou, i tae nei hoki a Mohi Turei, minita, ki Maketu, ki Rotorua, ki Tauranga i te hotoke nei; ko etahi hoki o nga minita o te pito whakararo, e haereere pena ana ki roto ki Waikato; otira ko te mea tika kia kauaka e poto noa te wa e mahia ai taua mahi, engari kia motuhia rawatia atu etahi ki reira hei tangata tuturu mo taua